



Savjeti za postizanje dobra na ovom i budućem svijetu (Meka)

Hatib: dr. Abdullah ibn Avad el-Džuheni

9. safer 1445. po Hidžri / 25. august 2023.

Hvala i zahvala pripadaju Allahu. Njega hvalimo, od Njega pomoć i oprost tražimo, i Njemu se utječemo od zla naših duša i naših loših djela. Koga Allah uputi, niko ga u zabludu ne može odvesti, a koga On u zabludi ostavi, niko ga ne može uputiti. Svjedočim da nema boga osim Allaha, jedinog, Koji nema druga, i svjedočim da je naš prvak i vjerovjesnik Muhammed, sallallahu alejhi ve sellem, Njegov rob i poslanik.

“O vi koji vjerujete, bojte se Allaha istinskom bogobojažnošću i nipošto ne umirite osim kao muslimani!” (Ali Imran, 102)

“O ljudi, bojte se Gospodara svoga, Koji vas je stvorio od jedne osobe, od koje je njen par stvorio, a od njih dvoje mnoge muškarce i žene rasijao. Bojte se Allaha, čijim imenom jedni druge molite, i čuvajte rodbinske veze. Allah vas, doista, nadzire.” (En-Nisa, 1)

“O vjernici, bojte se Allaha i govorite samo istinu, On će vas za vaša dobra djela nagraditi i grijehе vam vaše oprostiti. A onaj ko se Allahu i Poslaniku Njegovu bude pokoravao - postići će ono što bude želio.” (El-Ahzab, 70–71)

Najistinitiji govor je Allahova Knjiga, a najbolja uputa je uputa Muhammeda, sallallahu alejhi ve sellem. Najgore stvari su novine u vjeri, svaka novina je novotarija, svaka novotarija je zabluda, a svaka zabluda vodi u Vatru.

O vjernici, bojte se Allaha, jer pravi musliman je onaj od čijih su ruku i jezika sigurni drugi muslimani i od čijeg su zla sigurni svi ljudi.

Poslanikov halifa, nasljednik, Ebu Bekr, radijallahu anhu, rekao je: “Boj se Allaha tako što ćeš Mu biti pokoran, a budi mu pokoran tako što ćeš Ga se bojati. Neka se





tvoje ruke boje prolijevanja muslimanske krvi, tvoj stomak bespravnog jedenja njihovog imetka, a tvoj jezik govora o njihovoj časti. Obračunavaj svoju dušu za svaku lošu misao.”

O vjernici, budite svjesni Allahovog nadzora u svakom trenutku, bojte se za svoju vjeru, vjerovanje, nadajte se Njegovoj pomoći i podršci u svim stvarima i strpite se na neugodnostima, jer strpljivost je za vjeru ono što je glava za tijelo, kada se odsiječe glava, nestane tijela.

Kada čuješ riječ kojom se vrijeđa tvoja čast, i to te rasrdi, oprosti i pređi preko toga, jer tako postupaju odlučni i razumni ljudi. Uzvišeni kaže: “Strpljivo podnositi i praštati – tako treba svaki pametan postupiti.” (Eš-Šura, 43)

Radi svoja djela kao da gledaš u Uzvišenog Allaha, i smatraj se već mrtvim čovjekom.

Znaj da se zlo ne zaboravlja, a da dobro ne prolazi.

Znaj da je malo koje je dovoljno bolje od puno koje će te odvratiti od tvoje osnovne misije, i čuvaj se dove mazluma – onoga kome je učinjena nepravda.

Nijedan čovjek nije se svojim srcem predao Allahu, a da Allah u srcima vjernika nije usadio milost i ljubav prema njemu.

Čuvaj se trenutaka nemarnosti, obmane neprijatelja, navale i žestine strasti i ambicija duše, jer Allahov Poslanik, sallallahu alejhi ve sellem, rekao je: “Tvoj najveći i najopasniji neprijatelj je tvoj nefs, u tebi.” (Bejheki) Najveći je neprijatelj zbog toga što mu se slijepo pokoravaš.

Svaka stvar koja ti odiše istinom, ali nisi siguran u nju, izloži je sudu Kur’ana, sunneta i lijepog ahlaka, a ako ti se ni tada ne otkrije njena suština, zatraži mišljenje onoga čijom si vjerom i mišljenjem zadovoljan, i znaj da je istina prepoznatljiva i po tome da je prihvatljiva ljudskoj duši.

Zar nisi čuo riječi Poslanika, sallallahu alejhi ve sellem: “Pitaj svoje srce (ako imaš nedoumicu da li je nešto ispravno ili pogrešno), makar ti i mnoštvo ljudi reklo da je to ispravno.” (Ahmed sa dobrim senedom)





Svoje srce će pitati, u slučaju nedolumice, i postupiti onako kako mu ono nalaže samo onaj čije je srce zdravo, ali ne i onaj bolesnog srca, jer ako bolesno srce pitaš i za najveće grijeha, ono će ti ih dozvoliti (ohalaliti), bez ikakve sumnje.

Šejhul-islam Ibn Tejmijja, Allah mu se smilovao, rekao je: "Srce se ne može popraviti, spasiti, osjetiti slast, biti radosno, zdravo i smireno osim ako bude obožavalo i voljelo svoga Gospodara, iskreno Mu se predalo, makar mu se priuštiti svi mogući dunjalučki užici, zato što ono ima iskonsku potrebu za svojim Gospodarom. Čuvaj svoje srce od lošeg mišljenja lijepim mišljenjem, i često govori: 'Ja Hajju, ja Kajjum, O Živi, Vječni!', jer to će oživjeti tvoje srce i nadahnuti tvoj razum. Otkloni zavist od sebe kratkom nadom i oholost ponosom. Ostavi svaki postupak zbog kojeg ćeš se morati izvinjavati ljudima i izbjegavaj svaku situaciju koja će te opteretiti. Čuvaj svoju vjeru slijeđenjem sunneta, čuvaj svoj emanet traženjem znanja i zaštiti svoj razum manirima blagih ljudi. Traži od Allaha pomoć u svim stvarima i čini istiharu u svakoj situaciji. Ono što je Allah odabrao za tebe, ne bježi od toga. Obaveži svoju dušu onim djelima s kojima bi volio sresti Allaha. Izbjegavaj u ponašanju sve ono što prezireš kod drugih. Svako onaj u čijem društvu ne napreduješ svaki dan – kloni ga se. Uzmi svoj udio u blagosti, zauzdaj svoje tijelo vezico znanja, kontroliši svoje težnje spoznajom i sviješću o Allahovoj blizini, stoj pred Njim kao ponizni rob, i osjetit ćeš Njegovu milost i blagost. Allahov Poslanik, sallallahu alejhi ve sellem, rekao je: 'Ko želi znati kakva je njegova pozicija kod Allaha, neka pogleda kakva je Allahova pozicija kod njega. Allah će Svome robu dati onu poziciju kod Sebe koju on da Njemu.' (Hakim) Sve to zavisi od strahopoštovanja, znanja i spoznaje o Njemu."

Znaj da onaj ko odabere Allaha, i Allah će njega odabrati, i da onaj ko Mu se pokorava, taj Ga i voli, i da onaj ko ostavi nešto radi Njega, On ga neće kazniti zbog toga, kao što je rekao Allahov Poslanik, sallallahu alejhi ve sellem, Hasanu ibn Aliji ibn Ebu Talibu, radijallahu anhu: "Ostavi ono što je sumnjivo, i radi ono što nije sumnjivo." (Tirmizi i Ahmed)

Poštovani vjernici, znajte da će onaj ko bude slušao Allahov i Poslanikov govor otvorenog uma i razmišljao o njemu otvorenog srca, pronaći u njemu, od misli, slasti,





upute, lijeka za srce, berićeta i koristi, ono što neće pronaći ni u jednom drugom govoru.

Koliko je samo danas u ovom vremenu, ispunjenom smutnjama, iskušenjima i nedaćama, s jedne, i mržnjom, zavišću i neprijateljstvom, s druge strane, potrebno postupanje u skladu sa islamskim principima i njegovim moralnim načelima na koje podstiče plemeniti Kur'an i časni sunnet, i da se musliman okiti najljepšim osobinama i čvrsto drži ispravnog vjerovanja i Pravog puta, i s tim osobinama i kvalitetima poziva nemuslimane u islam. Nećete ljude privući svojim imetkom, nego će ih vama privući nasmijano lice i lijepo ponašanje.

Uzvišeni kaže: "Ti sa svakim – lijepo! I traži da se čine dobra djela, a neznalica se kloni! A ako šejtan pokuša da te na zlo navede, ti potraži utočište u Allaha, On uistinu sve čuje i zna. Oni koji se Allaha boje, čim ih sablazan šejtanska dodirne, sjete se, i odjednom dođu sebi." (El-A'raf, 199–201)

O muslimani, bojte se Allaha, bogobojaznost je najkorisnije sredstvo i opskrba, i ne budite kao oni koji su umjesto zahvalnošću Allahu na blagodatima nezahvalnošću uzvratili, i koji su zaboravili Njegove blagodati, i budite svjesni Njegovog nadzora, jer On zna sve o vama, vidi vas, zna svaki vaš pokret i mirovanje. "On zna poglede koji kriomice u ono što je zabranjeno gledaju, a i ono što grudi kriju." (Gafir, 19)

Obračunavajte svoje duše sve dok ste u Kući obračuna i mogućnosti činjenja djela, prije nego budete polagali račun u Kući nagrade/kazne i nestanka svih nada.

Spremite se za susret sa svojim Gospodarom i opskrbite se bogobojaznošću i dobrotom za život u kaburu i za Dan proživljenja.

Čuvajte se nemara, jer on je propast i zabluda.

Budite zadovoljni onim što vam je Allah odredio, jer sve što je Uzvišeni odredio, to je lijepo i dobro.

Donosite salavate i selame na donosioca radosnih vijesti i opomene, i blistavu svjetiljku, onoga koji je rekao: "Ono što će ljude najviše uvesti u Džennet jesu bogobojaznost i lijepo ponašanje", to vam je naredba od Allaha, koji je rekao: "Allah





"KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJJE
KOJU TOKOM HUTBE ELABORIRA." (PREPOROD)

HUTBE 

i meleki Njegovi blagosiljaju Vjerovjesnika. O vjernici, blagosiljajte ga i vi i šaljte mu pozdrav!" (El-Ahzab, 56).

Molim Allaha da i meni i vama podari blagoslov u časnom Kur'anu, i da podari da nam koriste njegovi ajeti i mudra opomena. Rekoh ovo i od Uzvišenog Allaha tražim oprost za sebe, za vas i sve muslimane od svakog grijeha, a tražite i vi, On mnogo prašta i On je milostiv.

